

Date – 16/11/2025
Time - 7:30 -7:40 Hrs
AKASHVANI AIZAWL

REGIONAL NEWS BULLETIN

HEADLINES (MORNING)

1. Sports Minister Pu Lalnghinglova Hmar hovin SYS Department leh Lunglei District Basketball Association te'n Sazaikawn Multipurpose Hall enkawl chungchanga inremna an ziaik.
2. Mizoram chhak lama awm Tualte a kut hnathawktute chu an hlawhtling hle a, kumin bikah sawhthing atangin cheng nuai 163 vel an lalut a, Tomato atangin cheng nuai 175 vel an lalut tawh bawk a ni.
3. Tribal Pasaltha te chawimawina ni 'Janjatiya Gaurav Varsh -Tribal Pride Day' chu Raj Bhavan tualzawlah nimin khan hman chhunzawm niin, ni hnih awh hun hman hi khar nghal a ni.
4. Indian Air Force (IAF) chu vawiin atangin France-ah, ram pahnihte tangkawpin air exercise vawi 8-na – Garuda 25-ah an tel tan dawn.

<><><>

SPORTS MINISTER

Sports Minister Pu Lalnghinglova Hmar hovin SYS Department leh Lunglei District Basketball Association te'n Sazaikawn Multipurpose Hall enkawl chungchanga inremna an ziaik.

Lunglei Circuit House-ah, nimin khan inremna hi ziah a ni a, Sports Minister hi Lunglei West bialtu MLA Pu T. Lalhlimpaia bakah, Sports & Youth Services Department hotute'n an tawiawm a. Inremnaah hian SYS Department ai awhin Director Pu H. Lalhmingthanga'n hming ziaikin, LDBBA ai awhin President Pu Moses Lalrinchhana Chinzah chuan hming a ziaik thung a. Hriatpuituah SYS Department Joint Director leh Lunglei DYSO te, LDBBA General Secretary leh Joint Secretary te'n hming an ziaik bawk.

Sports Minister Pu Lalnghinglova Hmar chuan Sazaikawn Multipurpose Indoor Stadium chu kum 2018-a hawn tawh ni mah se, hawn hnuah luah loh leh enkawl zui lohva a awm reng avangin a ramin, a tlabal nasa hle tih sawiin, sawrkarin hmunhma leh hmanraw tha a pekte hlut thiam leh hman tangkai a ngaih thu sawiin, sawrkarin sum tam tak senga hmunhma leh hmanrua a dinte tangkai taka hman leh enkawl chu khua leh tuite mawhpurhna a ni, a ti.

Sazaikawn Multipurpose Indoor Stadium hi Ministry of Youth Affairs & Sports hnuiaia Urban Sports Infrastructure Scheme sum cheng vaibelchhe 6 senga sak niin, a sak hna hi Lushai Engineers te'n an thawk a. A zau zawng hi square metre 2,484.86 niin, kum 2018 February ni 9 khan hawn a ni.

SYS Department leh LDBBA inremna ang chuan, Multipurpose Hall hi a neitu nihna chu SYS kutah awmin, a enkawltu (guardian) chu LDBBA a ni

dawn a. Hall aṭanga pawisa lak luh chu SYS Department-ah 30%, Hall enkawl nan Management Committee-ah 50% leh LDBBA sumah 20% a lut ang. He inremna hian agreement ziah ni aṭanga kum 3 (thum) chhung a huam ang a; a ṭul anga en nawn theih a ni ang

<><><>

TUALTE

Mizoram chhak lama awm Tualte a kut hnathawktute chu an hlawhtling hle a, kumin bikah sawhthing atangin cheng nuai 163 vel an lalut a, Tomato atangin cheng nuai 175 vel an lalut tawh bawk a ni.

Nimin khan Tualte khuaa Pu JH Lalnunmawia buh chhun fin leh buh thar lawmna chu chief minister Pu Lalduhoma'n a hman pui a, Agriculture Minister Pu PC Vanlalruata leh Deputy Speaker Pu Lalfamkima ten an tawiawm.

Pu JH Lalnunmawia hian Tualte khuaa Artlang ramah Tin sawm leh pasarih hmuna zauvah buh a ching a. Tin sangthum leh zaruk a thar chhuak a, phur sangkhat leh zahnih a ni. Mizo buh tehkhawng anga sawiin Mau tlawn zawn hnih leh Silai zawn chhun fin anga tam nia sawi a ni.

Chief Minister chuan, hetiang hun hi kal khawmte hian an la hmuh a ring lova, an hmu leh pawhin a ring chiah tawh lo a ti a. A tam em avangin Mizo buh tam lam chhiar danah pawh hming a nei tawh lo a. Chuvang chuan he ni hi a hlu a ni, a ti. A tharchhuaktu Pu JH Lalnunmawiate chhungkua lawmpuiin, midangte tana malsawmna thlen thintu an nihna Pathianin mal a sawm a ni a ti.

Pu Lalduhoma chuan Sorkarin kuthnathawktute a ngaipawimawh tih sawiin sawhthing thartute iptea support price lut ringawt pawh hi a tam tham hle a. Hnathawktu, mi taimate tan kawl a eng mek a ni, a ti.

<><><>

TRIBAL PRIDE DAY

Tribal Pasaltha te chawimawina ni 'Janjatiya Gaurav Varsh -Tribal Pride Day' chu Raj Bhavan tualzawlah nimin khan hman chhunzawm niin, ni hnih aw h hun hman hi khar nghal a ni.

Tribal Pasaltha te chawimawina ni kharna inkhawmah hian Planning & Programme Implementation Department Secretary Pu Lalmalsawma Pachuau chuan, Tribal Pride day an hman chu Tribal nihna leh Mizo nihna miin a chhuan tharna hun a ni chho zel tih sawiin, mahni nihna chu ngaihhlut zel a pawimawh tih a sawi a ni. Pu Lalmalsawma chuan Tribal Day puala Mizo kutchhuak hrang hrang phochhuah te chuan Mizote themthiam zia leh thil ngaihtuah chhuah thiam zia te a lantir tih sawiin a ni.

Planning & Programme Implementation Department-a Project Assistant H. Lalhruaitluanga chuan India ramín zalenna a hmuh theih nana tribal hrulaitu thawh hlawk tak, Bhagwan Birsa Munda pianchamphaphak vawi 150-na pualin November ni 1 atanga nimin ni 15 thlengin ram puma British awpna lo sualtu, tribal pasaltha te chawimawina hun 'Janjatiya Gaurav Varsh' hi hman a ni tih a sawi a, Mizoramah chuan ni 2 chhung November ni 14 leh ni 15-ah te hman a ni a, kumin hi a vawi khatna a ni a ti.

Mizorama Tribal pasaltha te chawimawina hmun Raj Bhavan tualzawlah hian Pasaltha Khuangchera, Nikuala, Lianphunga, Lalnu Ropuiliani leh Zakapa te chanchin leh an lem te phochhuah a ni a, Mizote kutchhuak hrang hrang stall 14-ah ei leh in tur, puan leh thiamhnang hmanga thil siam chhuah hrang hrangte chu mipui lei theiha phochhuah a ni tih a sawi bawk a ni.

Kolasib District Bawrhsap Pisa kawtzawlah Janjatiya Gaurav Diwas kharna pualin hun hman a ni a, DC Pu Robert C. Lalhmangaiha chuan he hunah hian Mizoram pawhin zalenna sualtu huaisen Lalnu Ropuiliani leh mi ropui tak tak te an nei ve a ni tih hre reng turin kalkhawmte chu a chah a. British hunlaia Mizo lalte, a bikin Pu Lalngura Sailo (Sentlang Lal), Pu Liankunga Sailo (Mualvum Lal) leh Pu Thanghulha Sailo te'n huaisen taka British sorkar an dodal dante a sawi.

Kolasibah hian a kharna neih hma hian School of Nursing Thingdawl te leh DIET Kolasibah te hun hman a ni a. Hmun hrang hrangah Tribal themthiamna leh an kutchhuakte pholan a ni bawk.

Serchhipah chuan DC Pu Paul L Khuma hovin Serchhip Pisapui Hall-ah tribal te chawisanna ni Janjatiya Gaurav Diwas lawm a ni a. Government Serchhip College zirtirtu pahnih Pu K Lalrinchhana leh Dr Zarzosanga ten Mizo pasaltha te leh zalenna sualtute, literature hmanga sulhnu pawimawh tam tak hnutchhiah tute atanga zirtur te lakhawmin, zirlai leh Birsa Munda piancham puala Janjatiya Gaurav Diwas hmangtute an zirtir bawk a ni.

Janjatiya Gaurav Diwas hi kartluana neih a ni a. District Education Officer hmalaknain zirlaiten Mizo infiamna chi hrang hrang te an sikulah an entir a ni.

Saitualah chuan District Bawrhsap Dr. Lalngura Tlau hovin tribal te hotu Bhagwan Birsa Munda piancham kum 150-na, Janjatiya Gaurav Diwas lawmna hun hman a ni a, he hun chhung hian tribal te tana hmalakna kalpui niin, Saitual District khaw pathum, Tawizo, Sihfa, Lenchim khuaah te "Certificate & Aadhar free Camp" neih a ni a, mipuite chu a thlawn vekin certificate leh aadhaar te siamsak an ni.

<><><>

MIZORAM UNDER 23

India rama cricket thuneitu sang ber Board of Control for Cricket in India (BCCI) hnuaia inelna - Men's U-23 State A Trophy Plate Group Match wawi lina chu nimin khan khelh niin Mizoram chuan Arunachal Pradesh run 41-in a hneh a, Plate Group Final an lut Chiang ta a ni.

Ropar, Punjab-a inkhelah hian Arunachal Pradesh chu thum vawrah chakin vawm hmasak an thlang a, Mizoram-in Over 50 chhungin run 235 siamin wicket sarih an hloh. Mizoram tan Captain, Johan Lalbiakkima'n run 87 a vaw chhuak a, C. Vanlalhruaia'n run 45 thawh bawkin an langsar.

2nd Innings-ah Arunachal Pradesh lamin over 47.2 chhungin run 194 chiah siamin an Out vek a. Mizoram tan Nasib Rai chuan wicket 3 a la a,

Lalmangaihzuala leh Prem Kumar Layak te chuan wicket 2 ve ve lain Johan Lalbiakkima, Lalduatliana leh Sahil Sharma te'n wicket 1 theuh an la bawk.

Mizoram hi Final lut tawh mah se Group Match hnuhnung ber khelh tur an la nei a, Mizoram ang tho a la chak vek Meghalaya nen naktuk November ni 17 hian an inkhel ang a. Noveber ni 19 hian Meghalaya nen tho final an khel ang a, a chak zawk zawk chu season tharah Elite Group-ah an kaisang dawn a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

IAF

Indian Air Force (IAF) chu vawiin atangin France-ah, ram pahnihte tangkawpin air exercise vawi 8-na – Garuda 25-ah an tel tan dawn. IAF hian tun thla ni 27 thleng French Air and Space Force (FASF) nen he exercise hi an nei dawn a ni. Ministry of Defense chuan he exercise atang hian siam that ngai tul ang ang te siamthat a tum thu a sawi a. Air Force pahnihte inkara inpawh tawwna, an zir chhuh te inhrilh tawwna hun remchang a siam bawk tih a sawi bawk. Exercise neih chung hian IAF ami Su-30MKI aircraft te hian French fighter te an thawk hoin, air-to-air combat, air defence, leh joint strike operation te an entir chin dawn a ni.

<><><>